

HINDS,, JOHN DARWIN VIVIAN (1922 - 1981), gwleidydd ac actifydd cymunedol

Enw: John Darwin Vivian Hinds

Dyddiad geni: 1922

Dyddiad marw: 1981

Rhiant: Leonard Hinds

Rhiant: Gwenllian Hinds (née Lloyd)

Rhyw: Gwryw

Galwedigaeth: gwleidydd ac actifydd cymunedol

Maes gweithgaredd: Gwleidyddiaeth a Mudiadau Gwleidyddol

Awdur: Myya Helm

Ganwyd John Darwin Hinds ar 28 Rhagfyr 1922 ym Maerdy, Sir Forgannwg, ac fe'i magwyd yn Stryd Morgan yn y Barri. Roedd ei fam, Gwenllian Hinds (g. Lloyd) yn wraig tŷ a anwyd yn y Barri, a'i dad, Leonard Hinds (1887-1942), yn forwr a ddaethai i'r Deyrnas Unedig o Farbados, ac yn nes ymlaen yn löwr. Gwasanaethodd Leonard fel taniwr ar longau masnachol yn y Rhyfel Byd Cyntaf ac enillodd Fedal Ryfel y Llynges Fasnachol yn 1919, a ddyfarnwyd i'r rhai a fu ar y môr am o leiaf chwe mis ac ar o leiaf un daith drwy barth peryglus. Wedi'r rhyfel, aeth Leonard yn löwr ym Maerdy. Ganwyd iddo ef a Gwenllian chwech o blant, yn cynnwys chwaer hŷn John, **Elvira Gwenllian Payne** (1917-2007), y fenyw Ddu gyntaf i fod yn gynghorydd yng Nghymru.

Ar ôl gadael yr ysgol dilynodd John Hinds ei dad trwy weithio fel glöwr ym Margoed am rai blynyddoedd. Ond cafodd gyfle wedyn i weithio yn Swyddfa'r Trefedigaethau yn Llundain, profiad a fu'n sbardun i'w ddeffro'n wleidyddol. Ymunodd â'r Blaid Lafur, ac wedi dychwelyd i'r Barri dechreuodd weithio i hyrwyddo galluogi cymdeithasol yn ne Cymru. Cafodd droedigaeth i'r ffydd Islamaidd tua'r un adeg ar ôl bod yn agos at farw o'r ddarfodedigaeth.

Cafodd Hinds yrfa lwyddiannus mewn gwleidyddiaeth leol yng Nghymru. Ef oedd y cynghorydd Du cyntaf a'r cynghorydd Mwslemaidd cyntaf yng Nghymru pan etholwyd ef i Gyngor Tref y Barri yn 1958. Ac yntau'n rhugl ei Gymraeg, roedd yn un o ddim ond tri o gynghorwyr a fedrai'r iaith. Yn 1975, gwnaeth hanes am yr eilwaith drwy fod y maer Mwslemaidd a'r maer Du cyntaf ar Gyngor Sir yng Nghymru (ac ym Mhrydain) pan etholwyd ef yn Faer Bro Morgannwg. Gwasanaethodd ei chwaer Elvira Gwenllian Payne yn Arglwydd Faeres iddo. Roedd ei ymroddiad i actifiaeth gymunedol yn amlwg yn ei ymdrechion i ddatrys amryw broblemau cymdeithasol, gan gynnwys annigolwch tai. Pleidiodd achos cyfiawnder i'r anabl hefyd trwy ddadlau dros sefydlu cangen leol o'r Gymdeithas Cŵn Tywys i'r Deillion.

Bu John Darwin Hinds farw ar 15 Mawrth 1981. Roedd yn arloeswr a dorrodd rwystrau hil, crefydd, a chynrychiolaeth mewn swyddi cyhoeddus yn ystod ei yrfa. Saif ei etifeddiaeth heddiw yn dyst i gyfraniadau Mwslemaid Du yng Nghymru, ac mae ei waith arloesol mewn gwleidyddiaeth ac actifiaeth gymunedol wedi llunio gwledigaeth fwy cynhyrsol o hunaniaeth Gymreig.

Awdur

Myya Helm

Ffynonellau

- '1975...NOT PERHAPS A good year', *The Glamorgan Gazette*, 2 Ionawr 1976, British Newspaper Archive
- 'Sheltered housing opens in Vale', *The Glamorgan Gazette*, 09 Ionawr 1976, British Newspaper Archive
- 'The Mayor of the Vale of Glamorgan Borough Council', *The Glamorgan Gazette* 19 Medi 1975, British Newspaper Archive
- 'Llwybr Hanes Cymunedol y Barri - Llwybr a Gwybodaeth Ysgol Uwchradd Pencoedtré, Cyngor Bro Morgannwg
- 'John D V Hinds in 1923', England & Wales births 1837-2006, Find My Past
- 'John Darwin Hinds', Black History Wales Resources, 2022
- 'Cymdeithas Amlddiwylliannol y Barri a Maer Du Cyntaf Cymru', Casgliad y Werin Cymru
- J. Baker, 'Opinion: Black lives matter in Wales (with thanks to some white women)', In Common, 6 Awst 2020
- P. Alexander, 'The Hinds Family', Black History Stories Wales
- 'Teulu Hinds / The Hinds Family', Brethyn Cymru

Darllen Pellach

'John Darwin Hinds (1922-1981)', Y Bywgraffiadur Cymreig / Dictionary of Welsh Biography, Casgliad y Werin Cymru

Dolenni Ychwanegol

Wikidata: Q125792258

Dyddiad cyhoeddi: 2024-11-25

Hawlfraint Erthygl: <http://rightsstatements.org/page/InC/1.0/>

Arddull APA



Helm, M., (2024). HINDS., JOHN DARWIN VIVIAN (1922 - 1981), gwleidydd ac actifydd cymunedol. Y Bywgraffiadur Cymreig. Adferwyd 6 Maw 2025, o <https://bywgraffiadur.cymru/article/c15-HIND-DAR-1922>

Diwylliant

Preifatrwydd a Chwcis
Hawlfraint
Y Prosiect
Cymorth
Cysylltu

LGC
NLW

LLYFRGEL
THE NATION



Nodi gan
Llywodraeth Cymru
Governed by
Welsh Government